

VENDIM
Nr.396, datë 26.9.1997

**PËR DETYRAT E GRUPIT MBIKËQYRËS TË KONTROLLIT FINANCIAR TË
PERSONAVE JURIDIKË JOBANKARË QË KANË MARRË HUA NGA PUBLIKU I GJERË**

Në mbështetje të neneve 2 dhe 3 të ligjit nr.8215, datë 9.5.1997 "Për kontrollin financiar të personave juridikë jobankarë që kanë marrë hua nga publiku i gjerë", Këshilli i Ministrave

VENDOSI:

1. Grupi mbikëqyrës i kontrollit financiar të personave juridikë jobankarë që kanë marrë hua nga publiku i gjerë është organ e bashkërendues pranë Këshillit të Ministrave ndërmjet administratorëve e ekspertëve kontabël dhe subjekteve që i nënshtrohen kontrollit dhe administrimit.

2. Grupi mbikëqyrës ka këto detyra kryesore:

- Ndjek, ndihmon dhe kontrollon zbatimin e drejtë e të njëjlojtë në të gjitha subjektet e kontrollit të akteve ligjore e nënligjore për kontrollin financiar të personave juridikë jobankarë që kanë marrë hua nga publiku i gjerë.

- Merr raporte dhe informacione periodike 10-ditore prej administratorëve të subjekteve të kontrollit për ecurinë e kontrollit financiar, problemet që dalin dhe masat që duhen marrë gjatë kontrollit financiar.

- Kryen udhëheqjen metodologjike të punës së ekspertëve kontabël dhe administratorëve të subjekteve të kontrollit, duke kërkuar zbatimin me rreptësi të dispozitave të ligjit për kontabilitetin e të standardeve ndërkombëtare në këtë fushë.

- Përgatit metodikat dhe udhëzimet në fushën e kontrollit financiar për të gjitha subjektet e kontrollit, duke kërkuar zbatimin e njëjlojtë të tyre, pavarësisht nga veçoritë dhe specifikat që ato paraqesin.

- Kërkon nga ekspertët kontabël dhe administratorët, për secilin subjekt të kontrollit, dokumentet e nevojshme financiare për numrin e kreditorëve, shumat e depozituara prej tyre, detyrimet financiare për t'u paguar, lëvizjen e parave, vleftat pasurore të objekteve në inventar, gjendjen e parave në arkë dhe bankë brenda dhe jashtë vendit, si dhe dokumente të tjera të nevojshme për transparencën e tyre.

- Kërkon nga Ministria e Ekonomisë Publike dhe e Privatizimit, si dhe nga Agjencia Kombëtare e Privatizimit, të dhëna të sakta lidhur me objektet që kanë privatizuar subjektet e kontrollit, listën me vlerësimet fillestare të këtyre objekteve dhe mënyrën e pagesës.

- Për shoqëritë huamarrëse që janë në proces hetimor ose gjyqësor, kërkon nga prokuroria shumat e përfituara nga subjektet politike, politikanët, deputetët, punonjësit e organeve tatimore, doganore e gjyqësore, ose nga personat e tjerë të administratës shtetërore dhe pjesëtarët e familjeve të tyre.

- Mbikëqyr respektimin e të drejtave dhe interesave pasurore të pjesëmarrësve në veprimtaritë e huamarrjes, duke bërë rekomandimet e nevojshme.

- Mbikëqyr zbatimin e legjislacionit civil të Republikës së Shqipërisë nga subjektet e kontrollit, duke bashkërenduar me administratorët e këtyre subjekteve.

- Studion efektet e veprimtarisë së huamarrjes në ekonominë e vendit tonë dhe përvojën e vendeve të tjera, ku janë ndeshur dukuritë e huamarrjes, dhe mbi këtë bazë propozon zgjidhjet përkatëse.

- Ruan karakterin konfidencial për të gjitha të dhënat e marra, me përjashtim të të dhënave që janë marrë nga burimet publike të informacionit ose që janë bërë të njohura njëkohësisht edhe prej këtyre të fundit.

- Ndërhyn, sipas rastit, për zgjidhjen e mosmarrëveshjeve që lindin gjatë procesit të kontrollit ndërmjet subjekteve të kontrollit e administratorëve, duke informuar Këshillin e Ministrave.

- Angazhon në kryerjen e detyrave të tij specialistë të fushave të ndryshme, të cilët janë të detyruar të plotësojnë kushtet për konfliktin e interesave dhe për ruajtjen e karakterit konfidencial të të dhënave.

- Informon, sa herë që e gjykon të nevojshme, Këshillin e Ministrave për ecurinë e kontrollit

financiar, për problemet që kanë dalë gjatë ushtrimit të kontrollit, si dhe bën propozimet e nevojshme për zgjidhjen e tyre.

- Bashkërendon punën me komisionin e ekonomisë, të buxhetit, financave dhe privatizimit për sigurimin e transparencës në veprimtarinë e huamarrjes.

- I propozon grupit të punës të caktuar nga Këshilli i Ministrave, për trajtimin e problemeve të transparencës së shoqërive huamarrëse dhe për ndryshime në aktet ligjore në fuqi për kontrollin e shoqërive huamarrëse.

- I propozon Këshillit të Ministrave projektligjin për skemën e shpërndarjes së parave, që do të evidencohen dhe mbledhen nga administratorët në subjektet e kontrollit.

- I propozon Këshillit të Ministrave, sipas rastit, shkarkimin e administratorëve nga subjektet e kontrollit, kur vëren shkelje të ligjit, të kompetencave dhe të të drejtave që ato kanë gjatë ushtrimit të detyrës së tyre, sipas ligjit.

- Mban lidhje të vazhdueshme me organet e shtypit dhe të medias publike, jep informacione e konferenca shtypi për publikun, duke e bërë sa më të plotë transparencën e shoqërive huamarrëse.

3. Grupi mbikëqyrës, për kryejën e detyrave që dalin nga ligji, harton rregulloren e brendshme të tij.

Anëtari i grupit mbikëqyrës, i caktuar nga Këshilli i Ministrave, është përfaqësuesi i këtij grupi.

Anëtarët e grupit mbikëqyrës mbledhen për të shqyrtuar raporte e informacione të ndryshme dhe për t'ia paraqitur ato Këshillit të Ministrave sa herë që shihet e nevojshme dhe siç përcaktohet në rregulloren e brendshme të veprimtarisë së tij. Kur ndërmjet anëtarëve të grupit mbikëqyrës ka mendime të kundërta, materiali i paraqitet Këshillit të Ministrave me mendimet e veçanta të tyre.

4. Grupi mbikëqyrës, për kryejën e detyrave që dalin nga ligji, ka strukturën e tij organizative dhe pagat sipas lidhjeve nr.1, nr.2 dhe nr.3 që i bashkëngjitet këtij vendimi.

Klasifikimi dhe përfshirja e administratorëve të subjekteve të kontrollit në një nga grupet e nivelit të pagave të përcaktuara sipas lidhjes nr.3 të këtij vendimi, është në kompetencë të grupit të mbikëqyrjes, i cili mban parasysh shtrirjen dhe përmasat e aktivitetit të kompanive huamarrëse, numrin e kreditorëve etj.

5. Për pagat e punonjësve të grupit dhe administratorëve të subjekteve të kontrollit, aparatit të Këshillit të Ministrave, në buxhetin e vitit 1997, i shtohen 7.0 milionë lekë, që përballohen nga fondi rezervë i Këshillit të Ministrave.

6. Ministria e Brendshme të marrë masa për të siguruar punën e grupit mbikëqyrës, në përputhje me dispozitat ligjore në fuqi.

Ky vendim hyn në fuqi menjëherë.

KRYETARI I KËSHILLIT TË MINISTRAVE

Fatos Nano

Lidhja nr.1

STRUKTURA ORGANIZATIVE E GRUPIT MBIKËQYRËS

- | | |
|-----------------------------------|--------|
| - Anëtarë të grupit mbikëqyrës | 3 veta |
| - Jurist | |
| - Ekonomist-arkivist | |
| - Përkthyes (anglisht-frëngjisht) | |
| - Sekretar i grupit mbikëqyrës | |
| - Shofer në grupin mbikëqyrës | |